

新元史

本紀

第八至第十三

第叁冊

本紀第八

新元史卷之八

賜進士出身日講起居注官翰林院侍讀國史館纂修膠州柯劭忞撰

立補世祖二

至元元年春正月丁丑朔高麗國遣使賀正旦戊戌楊大淵進羅絹三百端優詔諭之癸卯罷宋人互市二月辛亥選儒士譯寫經書並纂修國史丙辰罷陝西行戶部癸酉車駕幸上都詔總管史權等二十三人入覲三月己亥命尙書宋子貞陳時務子貞條十三策敕中書省議行之辛丑立漕運司夏四月己卯詔高麗國王王禘入朝丁卯追治李壇逆黨張邦直姜郁等二十七人

之罪五月乙亥峻脫顏郭守敬行視西夏河渠己亥中
書右丞粘合南合爲平章政事六月乙巳召王鶚姚樞
赴上都戊申高麗國遣使貢方物秋七月甲戌彗星出
輿鬼癸未以西番十八族部立安西州行安撫司事庚
子阿里不哥與玉龍答失阿速帶昔里給來降詔皆宥
之誅其部將不魯花等五人八月乙巳立山東行中書
省中書左丞相耶律鑄參知政事張惠等行省事頒新
立條格省併州縣定官吏員數分品從給俸祿授公田
考殿最均賦役招流亡禁擅用官物及以官物進獻借
貸官錢擅科差役凡軍馬不得停住村坊詞訟不得越

訴恤鰥寡勸農桑驗雨澤物價以鈔爲準具賊盜囚徒
起數申省部又頒陝西四川西夏中興北京行中書省
條格定諸王使臣驛傳稅賦差發不得擅招民戶及以
銀與非投下人爲幹赤禁口傳敕旨及追呼行省官屬
癸丑僧子聰同議樞密院事詔子聰復姓劉氏賜名秉
忠拜太保參領中書省事乙卯改燕京爲中都丁巳以
改元赦天下詔曰應天者惟以至誠拯民者莫如實惠
朕以菲德獲承慶基內難未勘外兵弗戢夫豈一日於
今五年賴天地之畀矜暨祖宗之垂裕凡我同氣會於
上都雖此日之小康敢朕心之少肆比者星芒示警雨

澤愆期皆闕政之所由顧斯民其何罪宣布維新之令
溥施在宥之仁據不魯花忽察脫滿阿里察脫火思等
搆禍我家依成吉思皇帝札撒克正典刑訖可大赦天
下改中統五年爲至元元年自至元元年八月十六日
昧爽以前除殺祖父母父母不赦外其餘罪無輕重咸
赦除之敢以赦前事相告者以其罪罪之九月壬申朔
立翰林國史院辛巳車駕至自上都庚寅十月壬寅朔
高麗國王王禰來朝庚戌有事於太廟丁卯宋理宗殂
其太子謹嗣位益都千戶毛璋劉成等謀反伏誅冬十
一月辛巳討骨嵬蠻壬辰罷領中書左右部阿合馬爲

平章政事阿里爲中書右丞十二月庚午始罷諸萬戶
世守立遷轉法

二年春正月辛未朔日有食之己卯鄧州監戰納懷新
舊軍萬戶董文炳並爲河南副統軍甲申申嚴越界販
馬之禁癸巳八東乞兒部牙西來貢方物丁酉高麗國
王王禘遣其弟珣來貢方物二月辛丑朔都元帥按陳
敗宋兵於釣魚山戊申封諸王兀魯帶爲河間王丁巳
車駕幸上都癸亥并六部爲四麥朮丁爲吏禮部尙書
馬亨爲戶部尙書嚴忠範爲兵刑部尙書別魯丁爲工
部尙書甲子以蒙古人充各路達魯花赤漢人充總管

回回人充同知著爲令同知東平路宣慰使寶合丁爲
中書平章政事廉訪使王晉爲參知政事廉希憲商挺
罷三月丁亥敕邊軍習水戰屯田夏四月庚寅敕軍中
犯法者勿擅戮輕罪斷重罪上聞詔四川山東等路邊
軍屯田閏五月癸亥移秦蜀行省於興元路丁卯分河
南屬州爲太宗子孫采地鄭州隸合丹鈞州隸明里睢
州隸孛羅赤蔡州隸海都平章政事趙璧行省事於南
京河南府大名順德洛磁彰德懷孟等路平章政事廉
希憲行省事於東平濟南益都淄萊等路中書左丞姚
樞行省事於西京平陽太原等路詔諸路府州不滿千

戶者可并則并之各投下并於所隸府州散府州戶少者不更設錄事司及司候司附郭縣以府州兼領括諸路未占戶籍任差職者以聞六月戊寅移山東統軍司於沂州萬戶重喜城十字路及正陽命禿剌戌之己卯高麗國遣使賀聖誕節參知政事王晉罷秋七月癸亥安南國王遣使貢方物戊寅高麗國遣使貢方物己卯中書省臣皆罷安童爲中書右丞相伯顏爲中書左丞相八月戊子召許衡於懷孟楊誠於益都車駕至自上都九月庚子皇孫鐵木兒生冬十月己卯有事於太廟癸未敕順天張柔東平嚴忠濟河間馬總管濟南張林

新元史卷八 本紀
四
太原石抹總管等戶改隸民籍十一月丙申召李昶於
東平十二月癸酉召張德輝於眞定徒單公履於衛州
丁亥選諸翼軍萬人充侍衛親軍

三年春正月乙未高麗國遣使賀正旦丙午遣朵端趙
璧撫諭四川軍民壬子立制國用使司以阿合馬爲使
二月丙寅廉希憲宋子貞爲中書平章政事張文謙復
爲中書左丞史天澤爲樞密副使癸酉立安撫高麗軍
民總管府治瀋州壬午中書右丞張易爲同知制國用
使司事參知政事張惠爲副使癸未車駕幸上都甲申
罷西夏行省立宣慰司立東京廣甯懿州開元恤品合

懶婆婆等路宣撫司三月己未前參知政事王晉及近
侍和哲斯轉運使王明坐隱匿鹽課並論死夏四月己
卯申嚴瀕海私鹽之禁五月乙未遣使者慮囚丙辰罷
益都行中書省六月丁卯封皇子南木合爲北平王戊
寅申嚴陝西河南竹禁秋七月丙申罷息州安撫司壬
寅詔上都路總管府遇車駕巡幸行留守司事八月丁
卯兵部侍郎黑的禮部侍郎殷宏使日本賜璽書曰皇
帝奉書日本國王朕惟自古小國之君境土相接尙務
講信修睦況我祖宗受天明命奄有區夏遐方異域畏
威懷德者不可悉數朕卽位之初以高麗無辜之民久

羅鋒鏑卽令罷兵還其疆場反其旄倪高麗君臣感戴
來朝計王君臣亦已知之高麗朕之東藩也日本密邇
高麗開國以來時通中國至於朕躬而無一乘之使以
通和好尙恐國王知之未審故特遣使持書布告朕心
冀自今以往通問結好以相親睦且聖人以四海爲家
不相通好豈一家之理哉以至用兵夫誰所好王其圖
之又賜高麗王植璽書曰今爾國人趙彝來告日本與
爾國爲近鄰典章文物有足嘉者漢唐而下亦或通使
中國故今遣黑的等往日本欲與通和卿其導去使以
徹彼疆開悟東方向風慕義茲事之責卿宜任之戊子

高麗國遣使賀聖誕九月戊午車駕至上都冬十月丁丑徙平陽經籍所於大都太廟成平章政事趙璧等集羣臣廷議定太廟爲八室十一月辛卯初給府州縣司官吏俸及職田平章政事宋子貞致仕辛亥忽都答兒爲中書左丞相禁天文圖讖等書十二月改四川行樞密院爲行中書省賽典赤也速帶兒等僉行中書省事丁亥張柔判行工部事與行工部尙書段天祐等城大都

四年春正月癸卯修曲阜宣聖廟乙巳百濟國遣使來朝辛亥趙璧爲樞密副使立諸路洞治都總管府癸丑

封昔木土山爲武定山其神曰武定公泉爲靈淵其神
曰靈淵侯乙卯高麗國遣使來朝戊午城大都析上都
隆興府自爲一路立開元等路轉運司二月庚申粘合
南合復爲中書平章政事阿里復爲中書右丞丁卯改
經籍所爲宏文院以馬天昭知院事丁亥車駕幸上都
三月己丑耶律鑄復爲中書右丞相壬寅右丞相忽都
察兒史天澤耶律鑄伯顏俱罷五月丁亥朔日有食之
敕上都重建宣聖廟丙辰析東平路博州別爲一路六
月乙丑史天澤復爲中書左丞相忽都答兒耶律鑄爲
平章政事伯顏爲中書右丞廉希憲爲中書左丞阿里

張文謙並參知政事乙酉罷宣徽院黑的殷宏奏高麗使者不能導至日本命仍至高麗賫璽書切責高麗國王使通諭日本期於必得要領秋七月戊戌大名路達魯花赤愛魯總管張宏範坐盜用官錢免官八月丙寅復立宣徽院以線眞爲院使丁丑封皇子忽哥赤爲雲南王壬午命怯綿討建都蠻高麗國遣使賀聖誕阿朮略地襄陽敗宋兵於牛嶺九月戊申許衡爲國子祭酒安南國王遣使貢方物庚戌遣雲南王忽哥赤鎮大理鄯闡察罕章赤禿哥兒金齒等處立大理等處行六部闊闊帶以尙書兼雲南王傅柴禎以尙書兼府尉甯源

以侍郎兼司馬詔安南國王陳光昺入朝癸丑車駕至
自上都冬十月庚申宋復陷開州辛酉制國用司言別
怯赤山石絨織爲布火不能然詔采之西番酋阿奴版
的哥等率衆來降授喝吾等處總管庚辰定品官子孫
廕敘格十一月乙酉有事於太廟甲戌立夔府路總元
帥府十二月庚戌立諸位韓脫總管府

五年春正月庚子建上都城隍廟辛丑高麗國王王禘
遣其弟湄來賀正旦並奏通使日本遣北京路總管于
也孫脫禮部郎中孟甲往諭高麗二月辛丑析甘州路
之肅州別爲一路三月甲寅禁民間兵器犯者驗多寡

定罪甲子敕怯綿招諭建都丁丑罷諸路女直契丹漢人爲達魯花赤者回回畏兀兒乃蠻唐兀特人仍舊夏五月癸亥都元帥百家奴拔宋嘉定府五花石城白馬三砦六月辛巳朔濟南人王保和等妖言惑衆敕誅首惡三人餘勿論己酉蔡國公張柔卒封諸王昔里吉爲河平王秋七月辛亥召高鳴劉瑜郝謙李天輔韓彥文李祐赴上都壬子罷各路奧魯官令管民官兼領之癸丑立御史臺右丞相塔察兒爲御史大夫詔曰臺官職在直言朕或有未當其極言無隱毋憚他人朕爲爾主仍諭天下知之戊辰罷西夏宣撫司庚午遣都統領脫

朵兒統領王國昌等點閱高麗兵船立東西二川統軍
司以劉整爲都元帥與阿朮同議軍事八月庚子忙古
帶討西番及建都蠻九月丁巳阿朮圍樊城己丑命黑
的殷宏復齎國書使日本仍敕高麗人導送車駕至自
上都史天澤復爲樞密副使冬十月戊寅朔日有食之
己卯敕中書省樞密院有事與御史臺同奏庚辰御史
中丞阿里爲參知政事立河南等路行中書省參知政
事阿里行省事庚寅敕禿忽思等譯毛詩孟子論語乙
未有事於太廟以和禮霍孫獨胡刺充翰林待制兼起
居注官十一月庚申宋兵自襄陽攻沿山城寨阿朮分